



Lebih 100,000 dibantu, bertungkus-lumus gerak usaha bersih sisa banjir

Seminggu selepas Bantuan Selangor Bangkit (BSB) diumumkan, Kerajaan Negeri terus menghulurkan bantuan RM1,000 bagi setiap keluarga mangsa bah yang berada di pusat pemindahan sementara.

Diumumkan pada 21 Disember, tiga hari selepas banjir besar, BSB memberi manfaat kepada 114,081 ketua isi rumah, tidak termasuk 13 keluarga waris korban yang menerima sumbangan RM10,000.

Setakat 28 Februari, Klang mencatat jumlah penerima paling ramai iaitu 60,427 isi rumah diikuti Petaling (20,948 penduduk) dan Kuala Langat (10,904 orang). Sebanyak 7,834 keluarga di Hulu Langat 6,878 (Sepang), 5,915 (Kuala Selangor) dan 1,041 (Gombak) turut mendapat bantuan tersebut.

Enam keluarga mangsa korban di Klang menerima sumbangan, diikuti Sepang (tiga), Hulu Langat (dua), masing-masing satu di Kuala Selangor dan Kuala Langat.

Selain meringankan beban keluarga, Kerajaan Negeri turut bertungkus-lumus menggerakkan usaha membersihkan sisa banjir dari rumah dan premis perniagaan.

Diketuai KDEB Waste Management (KDEBWM) dan pihak berkuasa tempatan (PBT), sebanyak 141,186.84 tan metrik sampah dibersihkan dalam tempoh sebulan pertama.

KDEBWM mengutip 48,589.95 tan metrik diikuti Perbadanan Pengurusan Sisa Pepejal dan Pembersihan Awam (SWCorp WM) yang mengangkut keluar 33,200 tan metrik sampah.

PBT yang mengurus kawasan-kawasan yang dilanda banjir mengeluarkan banyak sampah, antaranya Majlis Perbandaran Kajang mengutip 19,631.56 tan metrik, Majlis Bandaraya Shah Alam (18,973 tan metrik) dan Majlis Bandaraya Subang Jaya (18,727 tan metrik).

Pengurusan sampah pukal pascabanjir dijangka berakhir pada hujung bulan ini.

Untuk memulih prasarana awam, enam agensi terlibat, antaranya Jabatan Pengairan dan Saliran (JPS), Jabatan Kerja Raya (JKR), Lembaga Urus Air Selangor (Luas) dan Pengurusan Air Selangor (Air Selangor).

Kerajaan Negeri menyediakan RM45.86 juta kepada JPS untuk membaiki ban, tebing dan pintu air, selain membersihkan saluran air daripada sisa banjir teruk.

Pembaikan jalan raya pula menelan RM23.022 juta, termasuk RM14.62 juta di Hulu Langat untuk kerja baik pulih jalan, tebing dan cerun.

Untuk keselesaan umat Islam, Lembaga Zakat Selangor (LZS) memperuntuk RM7.5 juta bagi membantu memulihkan 150 buah masjid, surau dan sekolah agama yang rosak kerana banjir.

Tabung wakaf al-Quran diwujudkan bagi menggantikan naskhah yang rosak dengan pembelian 50,000 unit kitab suci dengan belanja RM1.5 juta.

Pendek kata, sesuai dengan slogan Kerajaan Negeri, Selangor segera bangkit daripada tragedi banjir untuk muncul sebagai wilayah yang tahan uji waima wabak Covid-19 atau bencana alam.

GERAK KERJA PENGURUSAN BANJIR

(maklumat sehingga pertengahan Januari kecuali dinyatakan tarikh lain)

- Petugas
21,784 orang
- Sukarelawan
50,000 orang
- Bantuan Selangor Bangkit
114,081 keluarga dapat RM1,000
13 waris terima RM10,000
(setakat 28 Februari)
- Aset
3,503 aset atau logistik digerakkan
- Kebajikan
227 pusat pemindahan banjir (PPS) tempatkan 11,237 keluarga atau 47,762 orang
- Pembersihan sampah banjir
KDEB Waste Management: 48,589.95 tan
SWCorp: 33,200 tan
Majlis Perbandaran Kajang: 19,631.56 tan
Majlis Bandaraya Shah Alam: 18,973 tan
Majlis Bandaraya Subang Jaya: 18,727 tan
Majlis Perbandaran Klang: 9,065.33 tan
jumlah: 148,186.84 tan metrik
- Prasarana dipulih
367 menara telekomunikasi
1,407 pencawang elektrik
- Kematian
25 orang (termasuk 6 warga asing)
- Wabak coronavirus
37 positif sebelum ke PPS
209 positif ketika disarin

SEGERA BERTINDAK BANTU RAKYAT

Walau Selangor tidak diramal bakal mengalami hujan lebat berterusan peringkat merah, Kerajaan Negeri tetap membuat persediaan awal sejak September lagi bagi berdepan ancaman Monsun Timur Laut.

Apabila hujan mencurah-curah mulai 17 Disember, biar tanpa amaran merah Jabatan Meteorologi Malaysia, pentadbiran negeri sudah bersiap sedia mengharungi banjir luar biasa seawal tengah hari 18 Disember.

Mesyuarat penyelarasan operasi menyelamatkan dan bantuan yang diketuai Dato' Menteri Besar Dato' Seri Amirudin Shari diadakan jam 3 petang setelah laporan banjir semakin banyak diterima.

Keadaan luar biasa tersebut diakui sendiri Perdana Menteri Datuk Seri Ismail Sabri Yaakob:

"Banjir di negeri Selangor yang bermula pada hari 18 Disember 2021 telah berlaku akibat daripada jumlah purata taburan hujan luar biasa iaitu 380 milimeter pada hari tersebut yang menyamai jumlah purata taburan hujan bagi tempoh sebulan.

"Pada masa yang sama, kejadian air pasang telah menyebabkan banjir ini bertambah lebih buruk," katanya ketika membentangkan laporan bencana pada sidang khas Dewan Rakyat awal tahun ini.

"Kejadian banjir yang berlaku ini melebihi kemampuan jentera tindak balas Jabatan Pengurusan Bencana Negeri Selangor. Selangor juga jarang berdepan dengan banjir besar luar biasa seperti kali ini."

Wartawan NADIAH ZAMLUS menyediakan fakta lengkap perkembangan penting bagaimana cepat dan tangkasnya Kerajaan Negeri menangani banjir besar hujung tahun lepas:

6 September

Mesyuarat pengurusan dan bantuan bencana dan persiapan menghadapi Monsun Timur Laut

7 September

Agensi Pengurusan Bencana Negara (Nadma) adakan bengkel dan latihan simulasi penyelarasan bencana bagi Monsun Timur Laut

22 Oktober

Mesyuarat penyelarasan Monsun Timur Laut dan air laut pasang besar

1 November

Jabatan Meteorologi Malaysia (MetMalaysia) beri amaran Monsun Timur Laut di negeri-negeri Pantai Timur bermula awal November hingga Mac 2022 tetapi Selangor tidak dinyatakan

17 November

Unit Pengurusan Bencana Negeri (UPBN) Selangor keluar kenyataan MetMalaysia jangka purata hujan sebulan: 250-370mm (November), 200-300mm (Disember) dan 150-230mm (Januari)

17 Disember

Tiada amaran hujan lebat dikeluarkan, hanya amaran kuning (waspada) di sebahagian utara Selangor walau Klang sudah dinaiki air sejak tengah malam sebelumnya

18 Disember

Amaran hujan sangat lebat yang berterusan atau amaran merah (bahaya) di seluruh Selangor hanya dikeluarkan jam 2 petang walau hujan mencurah-curah sejak semalam

- Dato' Menteri Besar ketuai mesyuarat penyelarasan banjir bersama agensi kerajaan pada 3 petang
- Agensi penyelamat barisan hadapan terus digerakkan, 46 pusat pemindahan sementara (PPS) dibuka dengan 3,582 mangsa di Klang, Petaling, Sepang, Kuala Langat dan Kuala Selangor
- Pusat Operasi SMART Selangor beroperasi 24 jam untuk selaras bantuan dan operasi menyelamatkan
- Sebanyak 134 pintu air ditutup bagi mengelak limpahan air laut pasang besar
- Amaran hujan sangat lebat yang berterusan atau amaran merah (bahaya) di seluruh Selangor dikeluarkan sekali lagi jam 8 malam
- Nombor telefon bilik gerakan UPBN, pihak berkuasa tempatan dan agensi kerajaan dihebahkan kepada umum untuk salur bantuan dan operasi menyelamatkan
- Menulis di Twitter jam 8.52 malam, Dato' Menteri Besar maklumkan Selangor mohon bantuan kerajaan persekutuan melalui perdana menteri dan menteri pertahanan
- Amaran hujan sangat lebat yang berterusan atau amaran merah (bahaya) di seluruh Selangor dikeluarkan lagi jam 10.30 malam
- Dato' Menteri Besar memantau PPS di Padang Jawa, Shah Alam setelah gagal ke kawasan-kawasan lain berdekatan akibat hubungan jalan raya terputus
- Nombor telefon pusat operasi banjir 24 jam selama tujuh hari dihebahkan kepada umum

19 Disember

Amaran hujan sangat lebat yang berterusan atau amaran merah (bahaya) di seluruh Selangor dikeluarkan jam 1.40 pagi

- Dato' Menteri Besar melawat PPS di Klang dan Kuala Langat termasuk membantu membawa keluar bayi, warga emas dan wanita yang perlukan perhatian khusus
- Seri Paduka Baginda Yang di-Pertuan Agong, DYTM Raja Muda Selangor dan perdana menteri masing-masing melawat mangsa banjir di lokasi berbeza
- Setiausaha kerajaan negeri ketuai mesyuarat penyelarasan banjir hari kedua bersama agensi kerajaan pada 8 malam

20 Disember

Jabatan Pengairan dan Saliran (JPS) Selangor menggerakkan lebih banyak bot, pam, jentera dan lori ke lokasi sangat memerlukan

- Setiausaha kerajaan negeri ketuai mesyuarat penyelarasan banjir kali ketiga bersama agensi kerajaan pada 12 tengah hari
- Dato' Menteri Besar ketuai mesyuarat penyelarasan banjir keempat bersama wakil-wakil rakyat termasuk pembangkang negeri pada 5.30 petang
- Seramai 32,044 mangsa ditempatkan di 162 PPS seluruh negeri dengan Klang merekod jumlah tertinggi 18,838 orang
- Operasi menyelamatkan dan menyalurkan terus digerakkan termasuk Team Selangor dan Sukarelawan Selangor (Serve)
- Makin ramai berjaya dipindahkan ke 203 PPS yang tempatkan lebih 30,000 penduduk (atau 4,672 ketua isi rumah)

21 Disember

Sidang media Dato' Menteri Besar, umum perkembangan terkini usaha menyelamatkan mangsa banjir dan fasa pembersihan pascabanjir serta pemulihan

- Bantuan Selangor Bangkit (BSB) dengan dana RM100 juta diumumkan:
- -RM1,000 bagi setiap keluarga mangsa banjir
- -RM10,000 bagi waris mangsa yang meninggal dunia
- -bil air selama sebulan dikecuali kepada mangsa bah
- -penangguhan bayaran balik peniaga kecil selama dua bulan
- -RM20 juta pembersihan, RM80 juta pembinaan prasarana
- Pusat penyelarasan orang ramai sebagai sukarelawan dan pusat pengurusan bantuan banjir dibuka

22 Disember

Sebanyak 192 PPS masih dibuka dengan 29,024 penduduk, tidak termasuk lokasi dan PPS yang dibuka orang awam

Sejak air surut pada 19 Disember, pihak berkuasa tempatan dan pengendali sisa pepejal KDEB Waste Management meningkat usaha pembersihan

23 Disember

RM10 juta disediakan kepada JPS bagi naik taraf sistem saliran di Taman Sri Muda, Klang

26 Disember

Sebanyak 177 daripada 186 kawasan banjir surut

Polis sahkan 25 orang meninggal dunia akibat banjir

Sebelas stesen pemindahan sementara sampah pukal telah dibuka bagi mempercepatkan kerja pembersihan

5 Januari

Jabatan Agama Islam Selangor (Jais) sasar beli 50,000 al-Quran bagi ganti naskhah yang musnah

7 Januari

RM40.88 juta diluluskan Kerajaan Negeri bagi projek pembersihan dan pemulihan infrastruktur

RM4 juta disedia bagi bantu 40,000 murid terjejas banjir

20 Januari

Perdana menteri mengakui kejadian banjir yang berlaku di Selangor melebihi kemampuan jentera tindak balas Jawatankuasa Pengurusan Bencana Negeri (JPBN)

28 Januari

Jabatan Perangkaan Malaysia (DOSM) anggar Selangor rugi RM3.1 bilion akibat bah, kira-kira 50 peratus jumlah seluruh negara

DOSM dapati ramai mangsa bah di Klang kembali hidup seperti biasa tidak sampai sebulan selepas bencana

4 Februari

Kerajaan timbang cadangan bina terowong saluran air banjir bawah tanah seperti di Kuala Lumpur di kawasan berpenduduk padat

<https://selangorkini.my/2022/03/lebih-100000-dibantu-bertungkus-lumus-gerak-usaha-bersih-sisa-banjir/>